

## 1 BLONG MEKEM RERE LONG TAEM BLONG HARIKEN

- Jekem gud kapa, mekemsua se i strong, taetem gud ol skru o jenisim sapos i gat nid.
- Jekem gud ol timba blong ruf we i stap aotsaed mo tu ol wud andanit, fasem gud o fiksimap sapos i gat nid.
- Jekem gud ol bigfala tri, luk sapos i gat branj we i save foldaon o ol roten branj mo katem sapos i posibol.
- Jekem gud ol gata mo paep blong ren wota, fasem gud o fiksimap sapos i gat nid.
- Mekemsua se wota we i ron i pas farawe long ol haos.

### TAEM HARIKEN I STAP KAM KLOSAP

- Klosem gud ol windo, ol windo blong hariken mo ol doa mo fasem gud.
- Mekemsua se ol samting we i stap aotsaed i no save flae olbaot mo spolem plante samting.
- Putum ol samting blong skul insaed long plastic bag mo mekemsua se wota i no save go insaed.
- Putum ol feneja olsem tebol mo jea, farawe long doa mo windo mo kavremap wetem tapolen.
- Ofem ol laet mo wota, pulumaot ol plag blong ol masin.

## 2 FIKSIMAP KAPA

### EVRI YIA

- Jekem gud ol nil o skru blong kapa mo evri ples long ruf. Taetem gud o jenisim ol nil sapos i gat nid.
- Jekem gud ol joen blong timba long ruf we oli joenem tugeta wetem nil o skru mo timba we i go long wol blong haos. Jekem ol bulong blong mekemsua se oli taet gud. Sapos i gat rosta, pentem blong protektem.
- Jekem gud ol kapa, skru, nil mo narafala aean we oli yusum long ruf blong mekemsua se i no gat rosta.
- Karemaot rosta wetem stilbras mo brumumaot.
- Pentem ol ples we i bin gat rosta long hem wetem pen blong aean fastaem (pen blong galvanaes kapa o narawan blong kapa we i pen finis olsem 'kalabond'). Afta pentem wetem las kot blong pen.

## 3 LUKAOTEM GUD REN WOTA

### EVRI MANIS

- Klinim ol gata mo ol koneksen we i joen i go long paep we i go daon.

### EVRI YIA

- Jekem gud ol gata, ol paep we i go daon mo ol paep we oli joen i go long tank, fasem o taetem gud sapos i gat nid.
- Karemaot doti we i stap insaed long tank.
- Jekem gud ol joen blong paep blong wota mo taetem o fiksimap sapos i gat nid.
- Jenisim wasa blong tap sapos i nid taem yu klinim tank.
- Leftemap lid blong tank mo jekem insaed blong tank
- Jekem, fiksimap o jenisim ol net we oli stap long maot blong hol antap long tank blong blokem ol smolsmol bebet mo doti blong no go insaed.
- Wasemaot mo klinim ol tank taem oli klosap emti.


## 4 LUKAOTEM GUD OL DOA MO WINDO

### EVRI YIA – OL DOA

- Jekem se ol hinsis, ol lok, ol bulong mo ol handel oli orate.
- Putum oel long ol lok, bulong, handel mo hinsis.
- Katemaot mo jenisim ol pat blong frem blong doa we oli roten.
- Wasem ol doa mo frem, pasem sanpepa long hem mo pentem bakegen taem i nid blong mekem.

### EVRI YIA – OL WINDO

- Jekem se ol hinsis oli taet gud mo taetem o jenisim sapos i gat nid.
- Putum oel long ol hinsis.
- Jekem gud ol windo blong hariken wetem frem long olgeta mo fiksimap sapos i gat nid.
- Wasem ol windo blong hariken mo frem, pasem sanpepa long hem mo pentem taem i nid blong mekem.



## 5 YU MAS OLTAEM YUSUM OL MAN WE I GAT GUDFALA SAVE LONG SAED BLONG WOK BLONG KAPENTA

Mekemsua se ol bilda oli gat ol stret tul blong mekem wok.

Ripotem long Ministri blong Edukesen mo Trening sapos i gat denja long eni bilding o wari long saed blong sefti.

Supavaesem ol wokman mo mekemsua se oli sef oltaem taem oli wok.